

LÉ GOURMAND BALOQUE ET LÉ FORT TCHÊNE

Bouônjour bouonnes gens, ch'est Helen Rom'thi tch'a l'pliaîsi d'vouos présenter la Lettre Jèrriaise aniet, lé dgiêx-neuf dé Juillet deux mille vingt-chînq.

L'aut' jour, j'tais à liêthe "Mêfie-té des Monstres", un court livre entouor tchiques légendes dé Jèrri. Jé l' trouvis hardi bouôn, mais j'fus un mio triste viyant qu'i' n'încliuthait pon ma légende favorite, "Lé Gourmand Baloque et l' Fort Tchêne". Jé n'connais pèrsonne tchi la connait, et don p't-êt' qué ch'est raiqu' eune histouaithe chârée dans ma fanmil'ye. Mais à m'n'avis, ch'en est eune bouanne, don, la v'chîn...

Un jour, y'a bein d's années, y'avait un gourmand baloque. San péthe l'avait r'nié et don, i' s'mînt en c'mîn à la r'chèrche d' eune bouonnefemme hardi travailleuse. Ch'n'était pon longtemps d'avant qu'il en trouvîsse ieune, dans eune fèrme, dans l' mitan d'la Pâraisse dé Saint Louothains.

Malheutheusement, la hardelle avait r'chu un co-d'pid à la tête par eune vague quand ou 'tait mousse et tristément ou n'pouvait d'aut faithe des bouonnes décisions. Lé gourmand baloque réalisit chennechîn bêtôt et i' s'attriotchit dans san tchoeu.

Un co qu'i' 'fûtent mathiés les choses dév'nîtent dé piêthe en piêthe viyant qu' lé reintchivâle, touos les jours, restait au liet et couait ses plians pour voler la fortune à la fanmil'ye dé sa bouonnefemme et les faits à ses vaîsîns. Comme lé temps pâssait, i' craîssait dé pus en pus aggravé, jusqu'à ch'qu'un jour san ventre crévit, viyant qu'il avait avalé tant d' jalousie et d'avarice.

Et don, juste au même temps, lé dgiâbl'ye pâssait tout prés et, enivré par lé rodgîn, il êpit par la f'nêtre. Lé dgiâbl'ye dansait aue jouaie d'aver trouvé un tel malîn esprit et tout d'siette fusit ensembl'ye les boudîns du baloque en échange pour sên âme.

Pèrsonne né savait pouortchi qu'lé gourmand baloque allait cliopîn-cliopant achteu, mais autchun né pouvait vaie qu'lé dgiâbl'ye avait sauté sus san dos et 'tait à j'va sus li achteu.

Lé gourmand baloque pâssait touos les jours criant ses ordres et ch'na n'fût pon longtemps d'avant qu'i' contrôlisse tout. Lé solé avait trop peux d'èrlithe et les nouages 'taient êffrités d'soûfflier par-dessus sa terre. Lé

fèrtille et bouôn tèrrain dé d'avant touônnit en poussiéthe. Les récoltes s'fanitent et mouothitent et, auve rein du tout à mangi, ses animaux mouothitent étout.

Éventuellement, i' y' eut raiqu'un seul fort tchène mâté à l'entrée d' la fèrme. Il' avait veu qu'lé dgiâbl'ye êtchèrforchait lé gourmand baloque, et don, ses fielles chuchotaient un averti ou à touos les siens tchi pâssaient. Lé gourmand baloque 'tait mârri comme un Nouormand comme i' n'pouvait pon contrôler l' bouais, et d'même, i' sautit dans san hèrnais à bras auve sa hache et c'mandit à sa femme dé l'pousser où'est qu'lé tchène sé butait.

Pouortant, aussitôt qu'lé gourmand baloque d'valit hors dé sén hèrnais, i' y' eut eune haute craque comme les réchinnes du tchène rompitent la tèrre. Il' env'loppaient tout l'tou lé gourmand baloque et il' atraînissent parfond et acouo pus parfond dans l' tèrrain.

Mêfi'-ous! S'ous êtes à vos prom'ner par St Louothains et qu'ou ouïyiz les chuchotements d'un tchène, ou d'vez happer la pathe au court-bouillon, viyant qu'un gourmand baloque n'est janmais satisfait et tréjous en veurt pus.

J'espéthe qu'ous avez bein aimé chute légende, autant comme mé. Ayiz touos eune bouonne sémaine et à la préchain.